

萬 有 文 庫

第一集一千種

王 雲 五 主 編

通 志 略

(八)

鄭 樵 著

商 務 印 書 館 發 行

通志略

(八)

鄭樵著

國學基本叢書

萬有文庫

第一集一千種

總編纂者

王雲五

商務印書館發行

禮略第二

吉禮下

宗廟

唐虞立五廟。其祭尚氣。先迎牲。殺於庭。取血。告於室。以降神。然後奏樂。尸入。王裸。以鬱鬯。夏氏因之。商制七廟。周制小宗伯掌建國之神位。宗廟在左。王立七廟。一壇一墀。曰考廟。曰王考廟。曰皇考廟。曰顯考廟。曰祖考廟。皆月祭之。遠廟爲桃。有二桃。享嘗乃止。去桃爲壇。去壇爲墀。壇墀有橋焉。祭之。無橋乃止。去墀曰鬼。天子遷廟之主。以昭穆合藏於二桃之中。漢高

帝令諸侯都皆立上皇廟。高帝崩，孝惠即位，令奉常叔孫通定宗廟儀法。帝東朝太后，長樂宮及間往，以數蹕煩民，乃作複道。武庫南通，奏曰：「陛下何自築複道？」高帝寢衣冠，月出游高廟。子孫奈何乘宗廟道上行哉？帝懼曰：「急壞之。」通曰：「人主無過舉，今已作，百姓皆知之矣。」願陛下爲原廟，渭北衣冠，月出游之，益廣宗廟大孝之本。帝乃立原廟，又尊高帝廟爲太祖廟。景帝尊孝文廟爲太宗廟，所常幸郡國，令各立太祖廟。至宣帝太始二年，復尊孝武廟爲世宗廟，凡所巡狩亦立焉。凡祖宗廟在郡國者六十八，合百六十七。

所而京師自高祖下至宣帝與太上皇悼皇考各於陵旁立廟并爲百七十六又園中各有寢便殿寢日四上食廟歲二十五祠便殿歲四祠元帝時丞相韋玄成等言春秋之義父不祭於支庶之宅元帝罷郡國廟以高皇帝爲太祖孝文皇帝爲太宗孝景皇帝爲昭孝武皇帝爲穆孝昭與孝宣俱爲昭皇考廟親未盡太上孝惠廟皆親盡宜毀太上廟主宜瘞園孝惠帝爲穆主遷於太廟寢園皆罷修後漢光武皇帝建武二年立高廟于雒陽四時祫祀高帝爲太祖文帝爲太宗武帝爲世宗如舊三年正月立親廟雒陽

祀父南頓君以上。至春陵節侯。時寇賊未平。祀儀未設。至十九年中。郎將張純等議禮。人子事太宗。降其私親。故孝宣帝以孫後祖。爲父立廟於奉明。曰皇考廟。於是議立平哀成元帝廟。代今親廟。兄弟以下。使有司祠。宜爲南頓君立皇考廟。祭上至春陵節侯。群臣奉祠。詔以宗廟處所未定。且拾祭高廟。其成哀平。且祠祭長安故高廟。其南陽春陵。歲時各且因故園廟祭祀。園廟去太守治所遠者。在所令長行太守事侍祠。惟孝宣帝有功德。其上尊號曰中宗。於是雒陽高廟。四時加祭。孝宣孝元凡五帝。其西廟成哀平三。

帝主四時祭於故高廟。東廟京兆尹侍祠。冠衣車服如太常祠陵廟之禮。皇考南頓君以上至節侯皆就園廟所在郡縣侍祠。明帝以光武中興更爲起廟。尊號曰世祖廟。以元帝於光武爲穆。故雖非宗不毀也。後遂爲常。明帝遺詔遵儉無起寢廟。藏主於世祖廟。更衣孝章初不敢違。以更衣有小別。上尊號曰顯宗廟。間祠於更衣。四時合祭於世祖廟。章帝遺詔無起寢廟。如先帝故事。和帝初不敢違。上尊號曰肅宗。後帝承遵。皆藏主于世祖廟。積多無別。是後顯宗但爲陵寢之號。靈帝時京都四時所祭高廟五主。世祖廟

七主。少帝三陵。追尊后三陵。凡牲用十八。太牢皆有副倅。故高廟三主。親毀之後。亦但殷祭之歲奉祠。獻帝初平中。董卓與蔡邕等。以和帝以下。功德無殊。而有過差。不應爲宗。及餘非宗者。追尊三后。皆奏毀之。四時所祭。高廟一祖二宗。及近帝四。凡七帝。魏文帝受禪。追尊大父曰大皇帝。考曰武皇帝。以洛京宗廟未成。乃祠武帝於建始殿。親執饋奠。如家人禮。明帝太和三年。又追尊高祖大長秋曰高皇夫人。吳氏曰高皇后。並在鄴廟之所祠。則文帝之高祖處士曾祖高皇祖大皇帝共一廟。考太祖武皇帝特一廟。百代

不毀。然則所祠止於親廟四室也。其年十一月，洛京廟成，則以親盡，遷處士主置園邑，使宗正曹恪持節迎高祖以下神主共一廟，猶爲四室而已。景初元年六月，群公更奏定七廟之制曰：武皇帝肇建洪基，爲魏太祖。文帝繼天革命，爲魏高祖。上集成大命，宜爲魏烈祖。於太祖廟北爲二桃，其左爲文帝廟，號曰高祖。昭桃，其右擬明帝，號曰烈祖。穆桃，三祖之廟，萬世不毀。其餘四廟，親盡迭遷，一如周后稷文武廟。桃之禮，晉武帝即位，追尊皇祖宣王爲宣皇帝，伯考景王爲景皇帝，考文王爲文皇帝，權立一廟。後用魏廟，追

祭征西將軍。豫章府君。潁川府君。京兆府君。與宣帝。景帝。文帝。爲三昭三穆。是時宣皇未升。太祖虛位。所以祠六代。與景帝爲七廟。六年。因廟陷。當改修創。群臣議奏曰。古者七廟異所。自宜如禮。又曰。古雖七廟。自近代以來。皆廟七室。於禮無廢。於情爲叙。亦隨時之宜也。東晉元帝上繼武帝。於禮爲禰。如漢光武上繼元帝故事。時西京神主陷於虜庭。江左建廟。皆更新造。尋以登懷帝之主。又遷潁川府君位。雖七室。其實五世。蓋以兄弟爲世數故也。于時百度草創。毀主權居別室。太興三年。將祭愍帝之主。乃更定制。還復。

豫章潁川于昭穆之位。及元帝崩，則豫章復遷至明
帝崩，而潁川又遷，猶十室也。于時續廣太廟，故三遷
主，並還西儲，名之曰桃，以准遠廟。成帝咸康五年，始
作武悼皇后神主柎廟，配饗世祖。成帝崩，而康帝承
統，以兄弟一代，故不遷京兆。始十一室也。康帝崩，穆
帝立，京兆遷入西儲，同謂之桃，如前三祖遷主之禮。
故正室猶十一也。穆帝崩，而哀帝海西並爲兄弟，無
所登除，咸安之初，簡文皇帝上繼元皇帝，於是潁川
京兆二主復還昭穆之位。簡文崩，潁川又遷。孝武帝
太元十六年，始改作太廟殿，正室十四間，東西儲各

一間。合十六間。棟高八丈四尺。備法駕。遷神主于行廟。及孝武崩。京兆又遷。如穆帝之世。四桃故事。宋武帝卽尊位。祠七代爲七廟。永初初。追尊皇考爲孝皇帝。皇妣趙氏爲穆皇后。三年。孝懿蕭皇后崩。又祔廟。高祖崩。神主升廟。猶昭穆之序。如魏晉之制。虛太祖之位。文帝元嘉初。追尊所生胡婕妤爲章皇太后。立廟於太廟西。其後孝武昭太后。明帝宣太后。並祔章太后廟。齊高帝追尊父爲宣皇帝。母爲昭皇后。七廟。梁武帝受禪。遷神主於太廟。爲三昭三穆。凡六廟。追尊皇考爲文皇帝。皇妣爲德皇后。廟號太祖。皇祖特

進以上。皆不追尊。擬祖遷於上。而太祖之廟不毀。與六親廟爲七。皆同一堂。共庭而別室。陳依梁制。七廟如禮。初文帝入嗣。而皇考始興昭烈王廟在。始興國謂之東廟。天嘉中。徙神主祔于梁之小廟。改曰國廟。祭用天子儀。後魏之先。居于漠北。鑿石爲祖宗之廟。於烏洛侯國西北。明元帝永興四年。立太祖道武帝廟於白登山。歲一祭。具太牢。帝親奉。無常月。又於白登。西太祖舊遊之處。立昭成獻明太祖廟。常以九月十月之交。帝親祭。牲用馬牛羊。又親行。驅劉之禮。孝文太和三年六月。親謁七廟。十五年四月。改營太廟。

詔曰。祖有功。宗有德。後者不得擅祖宗之名。居二祧之廟。今述尊先志。宜制祖宗之號。烈祖有創業之功。世祖有開拓之德。宜爲祖宗。百代不遷。而遠祖平文。功未多於昭成。然廟號爲太祖。道武建業之勲。高於平文。廟號爲烈祖。比校似爲未允。朕今奉尊道武爲太祖。而立二祧。餘皆以次而遷。十九年。遷都洛邑。二月。詔曰。太和廟已就。神儀靈主。宜時奉寧。可尅五月。奉遷於廟。其出金墉之儀。一準出代都太和之式。入新廟之典。可依近。至金墉之軌。其威儀鹵簿。如出代廟。百官奉遷。宜可省之。但令朝官四品以上侍官五

品以上宗室奉迎。北齊文宣帝受禪，置六廟，獻武以下不毀。以上則遞毀，並同廟而別室。既而遷神主於太廟，文襄文宣並太祖之子，文宣初疑其昭穆之次，欲別立廟，衆議不同。至二年秋，始祔太廟，四時并臘。凡五祭，禘祫如梁制。後周之制，思復古之道，乃右宗廟而左社稷。閔帝受禪，追尊皇祖爲德皇帝，父文王爲文皇帝，廟號太祖，擬祖以上三廟遞遷。至太祖不毀，其下相承，置二昭二穆爲五焉。明帝崩，廟號世宗。武帝崩，廟號高祖，並爲祧廟不毀。隋文帝受命，遣兼太保宇文善等奉策詣同州，告皇考桓王廟，兼用女

巫同家人之禮。追尊桓王爲武元皇帝。皇妣爲元明皇后。奉迎神主。歸于京師。改周制。左宗廟而右社稷。宗廟未言始祖。又無受命之祧。自高祖以下。置四親廟。同殿異室。一皇高祖。太原府君廟。二皇曾祖。康王廟。三皇祖。獻王廟。四皇考。太祖。武元皇帝廟。擬祖遷於上。而太祖之廟不毀。至煬帝立七廟。太祖各一殿。准周文武二祧。與始祖而三。餘並分室而祭。唐武德元年。追尊號高祖曰宣簡公。曾祖曰懿王。祖曰景皇帝。考曰元皇帝。法駕迎神主。祔于太廟。始享四室。貞觀九年。高祖崩。詔增修太廟。中書侍郎岑文本議曰。

祖鄭玄者。則陳四廟之制。述王肅者。則引七廟之文。貴賤混而莫辯。是非紛而不定。春秋穀梁傳。及禮記王制祭法禮器。孔子家語並云。天子七廟。諸侯五廟。大夫三廟。士一廟。尚書咸有一德曰。七世之廟。可以觀德。至於孫卿。孔安國。劉歆。班彪父子。孔昆。虞憲。于寶之徒。商較今古。咸以爲然。故其文曰。天子三昭三穆。與太祖之廟而七。是以晉宋齊梁。皆依斯義。立親廟六。若使違群經之正說。從累代之疑議。背子雍之篤論。遵康成之舊學。則天子之禮。下逼於人臣。諸侯之制。上僭於王者。非所謂尊卑有序。名位不同者也。

臣等參詳請依晉宋故事立親廟六其祖宗之制式遵舊典制從之於是增修太廟始崇弘農府君及高祖神主并舊四室爲六室開元十年加置九廟移中宗神主就正廟仍創立九室其後制獻祖懿祖太祖世祖高祖太宗高宗中宗睿宗太廟九室也

時享 薦新附

有虞氏四時之制春曰禴夏曰禘秋曰嘗冬曰烝其祭尚氣郊特牲云血腥爛祭用氣也法先迎牲殺之取血告於室以降其神然後用樂而行祭事其祭貴首夏氏時祭之名因有虞其祭貴心商人禴禘嘗烝

亦因虞夏之制。王制云：春禴，夏禘，秋嘗，冬烝。其祭尚聲。郊特牲云：臭味未成，滌蕩其聲，樂三闋，然後出迎牲。聲音之號，所以昭告於天地之間也。其祭貴肝。周祭春曰祠，夏曰禴，秋曰嘗，冬曰烝。以禘爲殷祭之名。其祭尚臭。郊特牲云：周人尚臭。灌用鬯臭，鬱合鬯臭。陰達於淵泉。旣灌，然後迎牲，致陰氣也。其祭貴肺。行九獻之禮。其四時新物，皆先薦寢廟而後食。二月獻羔，開冰。四月以彘嘗麥。七月登穀。八月嘗麻。九月嘗稻。十二月嘗魚。漢惠帝時，叔孫通曰：古者有春嘗果。方今櫻桃熟，可獻宗廟。諸果之獻，由此興。後漢光武

帝建武二年正月立高廟于雒陽四時禘祀高帝爲太祖文帝爲太宗武帝爲世宗如舊餘帝不祀四時春以正月夏以四月秋以七月冬以十月及臘一歲五祀靈帝時京都四時所祭高廟五主世祖廟七主少帝三陵追尊后三陵凡牲用十八太牢古不墓祭漢諸陵皆有園寢承秦所爲也說者以爲古宗廟前廟後寢以象人君之居前有朝後有寢月令有先薦寢廟詩稱寢廟奕奕言相通也廟以藏主以四時祭寢有衣冠几杖象生之具以薦新物秦始出寢起於墓側漢因而弗改故陵上稱寢殿起居衣服象生人

之具。建武以來，關西諸陵以傳久遠，但四時特牲祠。天子每幸長安，謁諸陵，乃太牢祠。自雒陽諸陵至靈帝，皆以晦望二十四氣伏臘及四時祠廟日上飯。太官選用物，園令食監典省其親陵所宮人，隨鼓漏理被枕具盥水。陳嚴具，魏初高堂隆云：按舊典，天子諸侯月有祭祀，其孟則四時之祭也，三牲黍稷，時物咸備。其仲月季月皆薦新之祭也。大夫以上將之以羔，或加以犬，不備三牲也。士以豚，庶人則唯其時宜魚鴈可也。皆有黍稷禮器曰羔豚而祭，百官皆足。太牢而祭，不必有餘。羔豚則薦新之禮也。太牢則時祭之。

禮也。詩云：四月其蚤，獻羔祭韭。周之四月，則夏之二月也。月令：仲春，天子乃獻羔開冰；季春之月，天子始乘舟薦鮪；仲夏之月，天子乃以雛嘗黍，咸薦之寢廟。此則仲季月薦新之禮也。宋四時祭祀，將祭必先夕牲，皇帝散齋七日，致齋三日，百官掌事者亦如之。致齋之日，御太極殿，幄坐，著絳紗袍，黑介幘，通天金博山冠，祠之日，車駕出，百官應齋從，駕上水一刻，皇帝著平冕龍袞服，升金根車，到廟北門，治禮謁者各引太樂令、太常、光祿勳、三公等皆入在位，皇帝降車入廟，脫舄盥，及洗爵訖，升殿，初獻，奠爵，樂奏，太祝令跪。

讀祝文訖。進奠神座前。皇帝還本位。博士引太尉亞獻訖。謁者又引光祿勳終獻。皇帝不親祠。則三公行事。而太尉初獻。太常亞獻。光祿勳終獻。齊永明元年正月。詔太廟四時祭薦。宣皇帝麩起餅鴨臠。孝皇后筍鴨卵脯醬炙白肉。高皇帝薦肉膾菹羹。昭皇后炙魚。皆所嗜也。梁武帝宗廟四時及臘。一歲五享。天監十六年。詔曰。夫神無常饗。饗于克誠。所以西鄰禴祭。實受其福。宗廟祭祀。猶有牲牢。無益至誠。有累冥道。自今四時烝嘗。外可量代。八座議以大脯代一元大武。八座又奏。既停宰殺。無復省牲之事。請立省饌儀。

其衆官陪列。並同省牲。帝從之。又詔。今雖無復用腥。猶有脯修之類。卽之幽明。義爲未盡。更可詳定。悉薦時蔬。左丞司馬筠等參議。大餅代脯。餘悉用蔬菜。從之。於是至敬殿。景陽臺立七廟座。月中再設淨饌。自是訖於臺城破。諸廟遂不血食。陳制一歲五祠。謂春夏秋冬臘也。每祭共以一太牢。始祖以三牲首。餘唯骨體而已。後魏孝文皇帝太和六年十一月。將親祀七廟。有司依禮具儀。於是群官議曰。昔有盧親。度祖考來格。商宗躬謁介福。攸降大魏。七廟之祭。依先廟舊事。多不親謁。今陛下孝誠發中。思親執祀。稽今古

義禮之常典。臣等謹按舊章。并採漢魏故事。撰祭服冠履牲牢之具。壘洗簋籩俎豆之器。百官助祭位次。樂官節奏之引升降進退之法。別集爲親拜之儀。制可。於是帝乃親祭。其後四時常祀皆親之。北齊制。春祀夏禴。秋嘗冬烝。皆以孟月。凡四祭。每祭室一太牢。武成帝始以皇后亞獻。河清中定令四時祭廟。及元日廟庭。並設庭燎二所。後周之制。其四時祭各於其廟。亦以皇后亞獻。其儀與北齊同。所異者。皇后亞獻訖。后又薦加豆之籩。其實菱芡芹菹兔醢。冢宰終獻訖。皇后親徹豆。降還版位。然後太祝徹焉。隋四時之

祭各以太牢。四時薦新於太廟。有司行事。而不出神主。祔祭之禮。並唯時享。唐四時各以其孟月享太廟。室各用一太牢。若品物時新堪進御者。有司先送太常。仍以滋味與新物相宜者配之。太常卿及少卿一人奉薦太廟。有司行事。不出神主。

禘

古者天子諸侯三年喪畢。皆合先祖之神而享之。以生有慶集之權。死亦備合食之禮。因天道之成。而設禘。禘之享。皆合先祖之神而享之。虞夏先王崩。新王元年二年喪畢而禘。三年春特禴。夏特禘。秋特嘗。冬

特烝。四年春特禴。夏禘。秋禘。嘗。冬禘。烝。每間歲皆然。以終其世。商人先王崩。新王二年喪畢而禘。三年春特禘。夏特禴。秋特嘗。冬特烝。四年春特禘。夏禘。禴。秋禘。嘗。冬禘。烝。周制天子諸侯三年喪畢。禫祭之後。乃禘於太祖。來年春禘于群廟。爾後五年再殷祭。一禘。一禘。禘以夏。禘以秋。禘祭之禮。大宗伯出高祖以下水主。守祧出先王先公祧主。皆入太祖后稷廟中。於室中之奧。西壁下東面。布太祖后稷位。尸在東北面。太祖之子於席前之北。南面爲昭。次昭之子在南。方北面相對爲穆。以次而東。孫與王父並列。直至櫺。

其尸各居木主之左。凡七尸。用九獻。禘祭之禮。一如禘祭所異者。但祭毀廟以上。不及親廟。其神主按鄭康成禘禘志云。大王王季以上遷主。祭於后稷之廟。其坐位與禘祭同。文武以下遷主。若穆之遷主。祭於文王之廟。文王居室之奧東面。文王孫成王居文王之東而北面。以下穆王直至親盡之祖。以次繼而東。皆北面。無昭主。若昭之遷主。祭於武王之廟。武王亦居室之奧東面。其昭孫康王亦居武王之東北南面。以次亦繼而東。直至親盡之祖。無穆主也。其尸位。后稷廟中。后稷尸一。昭穆尸各一。文王廟中。文王尸一。

穆尸共一。武王廟中。武王尸一。昭尸共一。後漢光武
建武二十六年。詔問張純禘祫之禮不行幾年。純奏
舊制三年一祫。毀廟之主。合食高廟。存廟主未嘗合。
元始五年。始行禘禮。父爲昭。南向。子爲穆。北向。父子
不並坐。而孫從王父。禘以夏四月。陽氣在上。陰氣在
下。故以正尊卑。祫以冬十月。五穀成熟。物備禮成。故
骨肉合飲食。今祖宗廟未定。且合祭高廟。遂以爲常。
後以三年冬祫。五年夏禘之時。但就陳祭毀廟主而
已。謂之殷祭。太祖東面。惠文武元四帝爲昭。景宣二
帝爲穆。惠景昭三帝。非殷祭時不祭也。魏明帝太和

四年六月武宣皇后崩。至六年三月有司以今年四月禘告。王肅議曰。按春秋魯閔公二年夏禘于莊公。是時縗經之中。至二十五月大祥便禘。不復禫。故譏其速也。去四年六月武宣皇后崩。二十六日晚葬。除服即吉。四時之祭皆親行事。今當計始除服日數。當如禮。須至禫月乃禘。東晉升平五年五月穆帝崩。十月殷祭。興寧三年二月哀皇帝崩。明年太和元年五月皇后庾氏崩。十月殷祭。太元二十一年十月應殷祭。其九月孝武崩。至隆安三年國家大吉。乃殷祭。元興三年夏應殷祭。太常博士徐乾等議應用孟秋進。

用孟冬時。安帝義熙三季。當殷祭。御史中丞范泰議。以章后喪未一周。不應殷祠。時從太常劉瑾議。小君之喪。不以廢大禮。往元興三年。四月不得殷祀。進用十月。若計常限。今當用冬。若更起端。則應四月。時尚書奏。從領司徒王謚議。反初。四月爲殷祠之始。徐邈議。禘三時皆可者。蓋喪終則吉。而禘服終無常。故禘隨所遇。唯春不禘。故曰特禘。非殷祀常也。宋制。殷祭皆卽吉。乃行。文帝元嘉六年。祠部定十月三日。殷祀。十三烝禮。孝武大明七年二月。有司奏。四月應殷祠。若事中未得。用孟秋。詔從之。梁武帝初。用謝廣議。三

王義爲長。以圓丘爲禘。與宗廟大祭同名。鄭義亦爲當。今互取鄭王二義。禘祫并爲一名。從王禘是祭圓丘大祭之名。上下同用。從鄭求爲定式。北齊延昌四年正月。宣武帝崩。孝明卽位三月。時議來秋七月應祫祭于太祖。太常卿崔亮上言曰。今宣武皇帝主雖入廟。然烝嘗時祭。猶別寢室。至於祫祭。宜存古典。按禮三年喪畢。祫於太祖。明年春。禘於群廟。又按杜元凱云。卒哭而除。三年喪畢而禘。愚謂來秋七月祫祭。應停。宜待年終。乃後祫禘。從之。唐前上元三年。有司祫享于太祖廟。時議者以禮緯三年一祫。五年一禘。

公羊傳云五年而再殷祭兩義互文莫能斷太學博
士史玄絜議曰按禮記正義列鄭康成禘祫志云春
秋僖公三十三年十二月薨文公二年八月丁卯大
事于太廟公羊傳云大事者何祫也是三年喪畢新
君二年當祫明年春禘于群廟僖公宣公八年皆有
禘則後禘去前禘五年以此定之則新君二年祫三
年禘自爾之後五年而再殷祭則六年當祫八年當
禘又昭公十年齊歸薨至十三年喪畢當祫爲平丘
之會冬公如齊至十四年祫十五年禘傳云有事武
宮是也至十八年祫二十年禘二十三年祫二十五

年禘。昭公二十五年有事于襄宮是也。如上所云。則禘後隔三年祫。以後隔二年禘。此則有合禮經不違傳義。自此禘祫之祭。依璿議。

臣謹按杜佑議曰。聖人制禮。合諸天道。使不數不怠。故有四時之制焉。而又設殷祭者。因天道之成。以申孝順之心。用盡事終之理。禘祫二禮。俱是大祭。先賢所釋。義各有殊。馬融王肅皆云。禘大祫小。鄭康成注二禮。以祫大禘小。賈逵劉歆則云。一祭二名。禮無差降。數家之說。非無典據。至於宣通經訓。鄭義爲長。誠以禮經及春秋所書。皆祫大於禘。

按春秋公羊傳云。大事于太廟。大事者禘也。禘者。毀廟之主。陳於太祖。未毀廟之主。皆升合食於太祖。至於禘。則云禘于莊公。禘于僖公。既不於太祖。則小於禘也。又逸禮記禘于太廟之禮云。毀廟之主。皆升合食而立二尸。又按韓詩內傳云。禘取毀廟之主。皆升合食於太祖。則禘小於禘也。禘則群廟之主。悉升於太祖廟。禘者各於其廟而行祭禮。二祭俱及毀主。禘之時。文王以上毀主。自在后稷廟而祭。文王以下毀主。自在二桃之廟而祭。禘則小於禘而大於四時也。曾子問主。夫子云。自非禘。

祭七廟五廟無虛主。而不言禘。小於禘明矣。其禘備五齊三酒。禘唯四齊三酒。禘則備六代之樂。禘則四代而下。又無降神之樂。以示其闕也。

功臣配享

盤庚云。茲予大享于先王。爾祖其從與享之。周制。凡有功者。銘書於王之太常。祭于太烝。司勳詔之。漢制。祭功臣於庭。生時侍燕於堂。死則降在庭位。與士庶爲例。魏高堂隆議曰。按先典。祭祀之禮。皆依生前尊卑之序。以爲位次。功臣配食於先王。像生時侍燕。燕禮。大夫以上皆升堂。以下則位於庭。其餘則與君同。

牢。至於俎豆薦羞。唯君備。公降於君。卿大夫降於公。士降於大夫。使功臣配食於烝祭。所以尊宗其德。明其勲以勸嗣臣也。議者欲從漢氏祭之於庭。此爲貶損。非寵異之位也。貴者取貴骨。賤者取賤骨。今使配食者。因君之牢。以貴賤爲俎。庶合事宜。周志曰。勇則害上。不登於明堂。共用謂之勇。言有勇而無義。死不登堂而配食。此則配食之義。位在堂之明審也。下爲北面。三公朝立之位耳。燕則脫履升堂。不在庭也。晉散騎常侍任茂議。按魏功臣配食禮。叙六功之勲。祭陳五祀之品。或祀之於一代。或傳之於百代。蓋祀穆

五祀。所謂傳之於百代者。古之王臣。有明德大功。若
勾龍之能平水土。柱之能樹百穀。則祀社稷。異代不
廢也。昔湯既勝夏。欲遷其社。不可。乃遷稷。周棄德可
代柱。而勾龍莫廢也。若四叙之屬。分主五方。則祀爲
貴神。傳之異代。載之春秋。非此之類。則雖明如咎繇
勳如伊尹。功如呂尚。各於當代祀之。不祭於異代也。
然則伊尹於商。雖有王功之茂。不配食於周之清廟。
以今之功臣。論其勳績。比咎繇伊尹呂尚。猶或未及。
凡云配食。各配食於主也。今主遷廟。臣宜從饗。大司
馬石苞等議。魏代功臣。宜歸之陳留國。使修常祀。允

合事理。唐貞觀十六年。有司言。禮。功臣配享於廟庭。禘享則不配。依令。禘祫之日。功臣並得配享。請集禮官。學士等議。太常卿韋挺等議曰。古者臣有大功享祿。其後子孫率禮。潔粢豐盛。禘祠烝嘗。四時不輟。國家大祫。又得配享焉。所以昭明其勲。尊崇其德。以勸嗣臣也。其禘及時享。功臣皆不應享。故周禮六功之官。皆配大烝而已。先儒皆以大烝爲祫祭。梁初。誤禘。功臣左丞何佟之駁議。武帝允而依行。降暨周齊。俱遵此義。禮禘無配功臣理。不可易從之。其儀具開元禮。

天子七祀 諸侯附

商制天子祭五祀。戶一。竈二。中雷三。門四。行五也。歲

徧凡祭五祀於廟門。戶主出入竈主飲食中雷主堂室居處行主道路。諸侯大夫與天

子同。周制王爲群姓立七祀。曰司命。曰中雷。曰國門。

曰國行。曰泰厲。曰戶。曰竈。諸侯爲國立五祀。曰司命。

曰中雷。曰國門。曰國行。曰公厲。大夫立三祀。曰族厲。

曰門。曰行。嫡士立二祀。曰門。曰行。庶人立一祀。或立

雷竈。或立戶。漢立五祀。白虎通云。戶一祀。春祭竈二祀。

夏祭門三祀。秋祭井四祀。冬祭中雷五祀。六月祭歲一徧。有司

行事禮頗輕於社稷。祭祀天子諸侯以牛。因四時祭牲也。祀戶以羊。竈以雞。中雷以

牛門以犬井以豕或曰中雷用牛不得用牛者用豕井用魚也後漢建武初有五祀

之祭門戶井竈中雷也有司掌之其祀簡於社稷矣

人家祀山神門戶山即厲也鬼有歸所乃不爲厲魏武王始定天下

興復舊祀而造祭五祀門戶井竈中雷也晉傳玄云

帝之都城宜祭一門正宮亦祭一門正室祭一戶井

竈及中雷各擇其正者祭之以後諸祀無聞唯司命

配享于南郊壇隋制其司命戶以春竈以夏門以秋

行以冬各於享廟日中雷則以季夏祀黃郊日各命

有司祭於廟西門道南牲以少牢唐初廢七祀唯季

夏祀祭中雷開元中制禮祭七祀各因時享祭之於

廟庭司命戶以春竈以夏門厲以秋行以冬中雷以季夏其儀具開元禮。

上陵

拜掃及諸節上會附

三代以前無墓祭。至秦始皇始出寢起於墓側。漢因秦。上陵皆有園寢。故稱寢殿。起居衣服象生人之具。古寢之意也。後漢都雒陽。以關西諸陵久遠。但四時特牲祀。每帝西幸。即親謁其雒陽陵。每正月上丁。郊廟畢。以次上陵。百官四姓親家婦女公主諸王大夫。漢紀曰。明帝永平元年。為外戚樊氏郭氏陰氏馬氏諸子弟立學。號曰四姓小侯。獨斷曰。凡與先后有瓜葛者。外國朝者。侍子。郡國計吏會陵。晝漏上水。大鳴臚。設

九賓隨立寢殿前。

薛宗曰九賓謂王侯公卿二千石六百石下及卽吏匈奴侍子共九

等也。鐘鳴謁者引客群臣就位如儀乘輿自東廂下太

常導出西向拜止旋升于階拜神座退後公卿群臣

謁神座太官上食太常樂奏食舉舞文始五行之舞

文始舞者本舜韶舞也高祖更名文始以示不相襲也五行舞者本周舞也秦始皇更名五行之舞也。

禮樂闕群臣受賜食畢郡國上計吏以次前當神軒

告其郡穀價民所疾苦欲神知其動靜孝子事親盡

敬愛之心也最後親陵遣計吏賜之帶珮八月飲酎

上陵禮亦如之靈帝以晦朔二十四氣伏臘及四時

祠廟日於陵所上飯宮人隨鼓漏理被枕盥水陳嚴

具。魏文帝詔曰：先帝躬履節儉，遺詔省約。子以述父
爲孝，臣以繫事爲忠。古不墓祭，皆設於廟。先帝高平
陵上殿皆毀壞，車馬還廐，衣服藏府，以從先帝儉德
之志。遂革上陵之禮。文帝自作終制，又曰：壽陵無立
寢殿造園邑。自後園邑寢殿遂絕。及齊王在位九載，
始一謁高平陵。晉宣王遺令子弟群官皆不得謁陵。
景文遵旨。至武帝，猶再謁崇陽陵。景帝一謁峻平陵。
文帝然遂不敢謁高原陵。宣帝至惠帝復止也。東晉
元帝崩後，諸公始有謁陵之事。蓋由眷同友執率情
而舉也。成帝時，中宮亦年年拜陵。議者以爲非禮。遂

正以爲定制。穆帝幼冲，褚太后臨朝，又拜陵。至孝武崩，驃騎將軍會稽王道子曰：「今雖權制釋服，至於朔望諸節，自應展情陵所，以一周爲斷。於是至陵，變服單衣，煩瀆無准，非禮也。」及安帝元興元年，左僕射桓謙奏：「百僚拜陵，起於中興，非晉舊典。積習生常，遂爲近法。尋武帝詔，乃不使人主諸王拜陵。及義熙初，又復江左之舊。宋文帝每歲正月謁初寧陵，武帝孝武明帝亦每歲拜初寧陵。文武後魏太和十六年九月辛未，孝文帝哭於文明太后陵左，終日不絕聲。素慕越音活，席爲次，侍臣侍哭。壬申，孝文又哭如昨。帝

二日不御食。癸酉朝中夕三時哭拜於陵前。夜宿鑿
玄殿。甲戌帝拜哭辭陵。還求樂宮。唐貞觀十三年。太
宗朝于獻陵。先設黃麾仗。周衛陵寢。至質明。七廟子
孫及諸侯百僚。蕃夷君長皆陪列于司馬門內。太宗
至小次。降輿納履。哭入關門西。再拜。慟絕不能興。禮
畢。改服入于寢。躬親執饌。閱視高祖先后服御之物。
悲慟。左右侍御者莫不歔歔。禮畢。太宗出自寢宮。步
過司馬門。泥行二百餘步。上入寢哭踊絕于地。進至
東階。西面再拜。號慟久之。乃進太牢之饌。加珍羞具
品。引太尉無忌。司空績。越王貞。趙王福。曹王明。及左

也。衛將軍程知節並入，執爵進俎，上至神座前，拜哭奠饌。闕先帝先后衣服，拜辭訖，行哭出寢北門，乃御小輦還宮。高宗永徽二年，有司言：「謹按獻陵三年之後，每朔及月半上食，其冬夏至伏臘清明社等節，日亦上食。其昭陵請依獻陵故事。」上從之。六年正月，謁于昭陵，有司先設儀衛於陵寢，質明，七廟子孫，二王後，百僚，州鎮蕃牧，四夷君長等並陪列于位。皇帝降輦入次，易服出次，行哭就位，再拜，擗踊慟絕，禮畢，又改服奉謁寢宮。其妃嬪公主先於神座左右侍列，如平生。帝入寢門，即哭，瞻視幄座，踊絕于地，進至東階。

西面再拜號哭。乃進牢饌。珍羞引三公諸王並入。執爵進俎。帝至神座前。再拜哭。自奠饌。閱先帝先后衣服。更增感絕。拜辭訖。行哭出寢北門。中宗景龍中。每日奠祭。太常博士彭景直上疏曰。謹按二禮。無諸陵日祭之事。又按禮論。譙周祭志云。天子之廟。始祖及高祖祖考。皆每月朔加薦新。以象平生朔食也。謂之月祭。二桃之廟。時祭。無日祭之文。又鄭氏注儀禮云。月朔月半。猶平常之朝夕也。大祥之後。即四時焉。此則古者祭皆在廟。近代以來。始分月朔月半及諸節日祭於陵寢。至後漢陵寢致祭。無明文。自魏三祖以

下不於陵寢致祭。並附於古禮。至江左亦不崇園寢。及齊梁陳。其祭無聞。今參詳以爲三禮者不刊之書。外傳所記。不與經合。不可依憑。其諸陵請准禮。停日祭。不從。詔乾陵宜依舊朝。晡進奠。昭獻二陵。每日一進。以爲常式。舊制每年四季之月。常遣使往諸陵。起居太常博士。唐紹上疏曰。自安宅兆。禮不祭墓。當謂迷形而往。山陵爲幽靜之宮。迎精而返。宗廟爲享薦之室。但以仲月。命使巡陵。鹵簿衣冠。禮容必備。自天授以後。時有起居。因循至今。乃爲常事。起者以起。動爲稱。居者以居。止爲名。敢辭命使勞繁。但恐不安。靈

域又降誕之日。穿針之辰。皆以續命爲名。時人多有進奉。今聖靈日遠。仙駕難攀。進止起居。恐乖先典。請停四季及降誕并節日起居。陵使但准式二時巡陵。庶合禮經。不從。開元二十年四月制曰。寒食上墓。禮經無文。近代相傳。浸以成俗。士庶有不合廟享。何以用展孝思。宜許上墓。同拜埽禮。不得作樂。仍編入五禮。未爲定式。二十三年四月勅。獻昭乾定橋。恭六陵朔望上食。歲冬至寒食日。各設一祭。如節祭共朔望日相逢。依節祭料。橋陵除此日外。仍每日進半口羊食。天寶二年七月勅。詩著授衣。令存休澣。在於臣子。

猶及恩私。恭事園陵。未標令式。自今以後。每至九月一日。薦衣于陵寢。貽範千載。庶展孝思。

臣謹按。上陵之禮。謝承漢書曰。靈帝建寧五年正月。車駕上原陵。蔡邕爲司徒掾。從上行到陵。見其儀愴然。謂同座者曰。聞古不墓祭。朝廷有上陵之禮。始爲可損。今見其儀。察其本意。乃知孝明帝至孝。惻隱不可易舊。或曰。本意云何。昔京師在長安時。其禮不可盡得聞也。光武卽世。始葬于此。明帝嗣位踰年。群臣朝正。感先帝不復聞見此禮。乃率公卿百僚。就園陵而創焉。尚書階西設神座。天子

事亡如事存之意也。苟先帝有瓜葛之屬，男女畢會。王侯大夫，郡國計吏，各向神座而言。庶幾先帝神魂聞之，以明帝聖孝之心，親服三年，又在園陵初興此儀，仰察几筵，下顧群臣，悲切之心，必不可。邕見太傅胡廣曰：國家禮有煩而不省者，不知先帝之用心，周密之至於此也。廣曰：然。子宜載之，以示學者。邕退而記焉。又按飲酎之禮，丁乎漢儀曰：酎，金律文帝所加，以正月旦作酒。八月成，名曰酎酒。因令諸侯助祭，貢金漢律金，布令諸侯列侯各以民口數率千口奉金四兩，奇不滿千口至五

百口亦四兩。皆會耐少府受。又九真交趾日南者。用犀角二。長九寸以上。若玳瑁甲一。鬱林用象牙。長三尺以上。若翡翠各二十。准以當金。漢舊儀曰。皇帝於八月耐車駕夕視牲。以鑑燧取水於月。取火於日。爲明水火。左袒以水沃牛。右肩手執鑿刀。以切牛毛。薦之。而即更衣。侍中上熟乃祀。

釋奠

周制。凡始立學。必釋奠于先聖先師。及行事。必以幣。凡學。春官釋奠于先師。秋冬亦如之。官謂禮樂詩書之官也。周禮凡有道者。有德者。使教焉。死則以爲樂祖。祭於瞽宗。此謂先師之類。不言夏從春。可知。釋奠者。設薦饌酌奠。

而已。無迎尸始立學者。既釁器用幣。禮樂之器成則釁之。又用幣告以下之事。先聖先師以器成也。然後釋菜。祭菜示敬道也。鄭康成曰。禮先聖先師也。菜芹藻之屬也。天子視學。大昕鼓以警衆也。衆至然後天子至。乃命有司行事。祭先師先聖焉。有司卒事。反命。天子乃命將出征。受命於祖。告祖也。受成於學。定兵謀也。出征執有罪。反釋奠于學。以訊馘告。釋菜奠幣。禮先師也。詩云。在頻獻馘。魏齊王正始中。有講經徧。輒使太常釋奠於辟雍。以太牢祠孔子。以顏回配。晉武帝泰始七年。惠帝元康三年。二釋奠皆於太學。泰始六年。元康五年。二行鄉事。皆於辟雍。鄉事。鄉飲酒禮也。惠帝愍懷之爲太子。皆講經。竟並親釋奠。

於太學。東晉明帝之爲太子，亦行釋奠禮。成穆孝武三帝，皆親釋奠。唯成帝在辟雍，自是一時制也。孝武以太學在水南懸遠，有司議依穆帝升平元年於中堂，權立行太學釋奠禮。畢會百官六品以上，有司奏應須二學生百二十人，太學生取見人六十，而無國子生，權銓大臣子孫六十人，事訖罷之。宋文帝元嘉二十二年，太子釋奠，採晉故事。裴松之議應舞六嘉二十二年，太子釋奠，採晉故事。裴松之議應舞六性牢器用，祭畢臨學宴會。天子以下悉在。齊武帝末明三年，有司奏宋元嘉舊事，學生到先釋奠，先聖先師禮，又有釋菜，未詳今當行何禮，用何樂及禮器。時從喻希議，用元嘉故事，設軒懸之樂，六佾之舞，牲牢

器用悉依上公。梁武帝天監八年，皇太子釋奠，周捨議既唯大禮，請依東宮元會。太子著絳紗褩，音轉衣領也。樂用軒懸，合升殿坐者，皆服朱衣，帝從之。又有司以爲禮云：凡爲人子者，升降不由阼階，吏部卽中徐勉議，鄭玄云：由命士以上，父子異宮，宮室旣異，無不由阼階之禮。請釋奠及宴會，太子升堂，並宜由東階。若輿駕幸學，自然中階。其會賓客，依舊西階。大同七年，皇太子表其子寧國臨城公入學，時議者以與太子有齒胄之議，疑之。臣纘等以爲參點回路，並事宣父。鄒魯稱盛，洙汶無譏。制可。北齊將講於天子，先定經

於孔子廟講畢。以一太牢釋奠孔宣父。配以顏回。列軒懸樂。六佾舞。皇太子每通一經。及新立學。必釋奠禮先聖先師。每歲春秋二仲。常行其禮。每月朔。祭酒領博士以下。及國子諸學生以上。太學四門博士升堂助教以下。太學諸生。階下拜孔子。揖顏回。日出行事。其郡學則於坊內立孔顏廟。博士以下。亦每月朝。隋制。國子寺每歲四仲月上丁。釋奠於先聖先師。年別一行鄉飲酒禮。州縣學則以春秋仲月釋奠。亦每年於學一行鄉飲酒禮。唐武德二年。於國子學立周公孔子廟各一所。四時致祭。貞觀二十一年。制左丘明以下二十二人同享。初以儒官自爲祭主。直云博

士姓名。昭告于先聖。又州縣釋奠。亦博士爲主。許敬宗奏曰。秦漢釋奠無文。魏氏則太常行事。自晉宋以降。時有親行。而學官爲主。全無典實。在於臣下。理不合專。今請國學釋奠。令國子祭酒爲初獻。詞稱皇帝。謹遣。仍令司業爲亞獻。博士爲終獻。其州學。刺史爲初獻。上佐爲亞獻。博士爲終獻。縣學。令爲初獻。丞爲亞獻。主簿及尉通爲終獻。循附禮令。以爲求制。景龍二年七月。皇太子將親釋奠於國學。有司草儀注。令從臣皆乘馬。著衣冠。太子左庶子劉知幾進議曰。古者自大夫以上。皆乘車。而以馬爲駢服。魏晉以降。迄

于隋氏朝士又駕牛車。至如李廣北征解鞍憇息馬。援南征據鞍顧盼。斯則鞍馬之設行於軍旅戎服所乘。貴於便習者也。按江左官至尚書卽而輒輕乘馬。則爲御史所彈。又顏延年罷官後好騎馬出入閭里。當時稱其放誕。此則專車憑軾可掬朝衣單馬御鞍。宜從褻服求之。近古灼然之明驗也。襃衣博帶方履高冠。本非馬上所施。自是車中之服。且長裙廣袖。襜如翼如。鳴珮紆組。鏘鏘弈弈。馳驟於風塵之內。出入於旌旆之間。儻馬有驚逸。人從顛墜。遂使屬車之右。遺履不收。清道之傍。維驂相續。因以受嗤。行路有損。

威儀其乘馬衣冠竊謂宜從廢改皇太子令付外宣
行仍編入今以爲常式開元十一年詔春秋釋奠用
牲牢其屬縣用酒脯而已二十七年八月因釋奠文
宣王始用宮懸之樂二十八年二月勅文宣王廟春
秋釋奠宜令攝三公行禮著之常式國子祭酒劉瑗
奏準故事釋奠之日群官道俗等皆合赴監觀禮請
依故事著之常式制可具儀其開元禮

祀先代帝王

名臣附

漢武帝時有人言古者天子以春解祠祠黃帝用一
梟破鏡方士云以歲始被除凶災令神仙之帝食惡
逆之物使天下爲逆者破滅梟名食母破鏡

各食父如繩而虎眼黃帝欲絕其類使百吏祠皆用焉漢使東郡送梟五月五日作羹以賜百官解祠者解罪求後漢章帝元和春東巡狩使使者奉一太牢祠帝堯於濟陰魏武帝少時漢太尉橋玄獨先禮異焉故建安中遣使祠以太牢東晉孝武帝寧康三年七月故事祀臯陶於廷尉寺新禮移祀於律署以同祭先聖於太學舊祀以社日新改用孟秋以應秋政後魏文成帝東巡歷橋山祀黃帝孝文太和十六年詔曰法施於人祀有明典立功垂惠祭有常式其孟春應祀者頃以事殷遂及今日可令以仲月而饗祀焉凡在祀令者有五帝堯樹則天之功興巍巍之治

可祀於平陽。舜播太平之風，致無爲之化，可祀於廣
寧。禹禦洪水之災，建天下之利，可祀於安邑。周文公
制禮作樂，垂範萬葉，可祀於洛陽。其宣尼廟已於中
省，別勅有司行事。自文公以上，可令當界牧守各隨
所近攝行祀事，皆用清酌尹祭也。曲禮曰：脯。隋制使
曰尹祭。祀先代王公帝堯於平陽，以契配。帝舜於河東，咎繇
配。夏禹於安邑，伯益配。商湯於汾陰，伊尹配。文王武
王於澧渭之郊，周公召公配。漢帝於表陵，蕭何配。各
以一太牢，而無樂。配者饗於廟庭。唐前修禮，令無祭
先代帝王之文。禮部尚書許敬宗等奏，謹按禮記祭

法云。聖王之制祭祀也。法施於人。以死勤事。以勞定國。能禦大災。能捍大患。則祀之。始皇無道。所以棄之。漢祖典章法垂於後。自隋以上。亦在祠列。今請聿遵故實。三年一祭。以仲春之月。天寶六載正月。制三皇置一廟。五帝置一廟。有司以時祭享。至七載五月。詔三皇以前帝王。宜於京城內共置一廟。仍與三皇五帝廟相近。以時致祭。天皇氏地皇氏人皇氏有巢氏燧人氏。其祭料及樂。請准三皇五帝廟。以春秋二時享祭。歷代帝王肇跡之處。未有祠宇者。所由郡置一廟享祭。仍取當時將相德業可稱者二人配享。

老君祠 先賢附

後漢延熹八年使中常侍之陳國苦縣祠老子九年親祠老子於濯龍中文廟爲壇飾純金鉤器設華蓋座用郊天樂唐乾封元年追號老君爲太上玄元皇帝文明元年九月冊老君妻爲先天太后立尊像於老君廟所開元二年三月親祠玄元皇帝廟追尊玄元皇帝父周上御史大夫敬爲先天太皇仍於譙郡置廟餘一祀以上唯先天太后廟例二十九年兩京及諸州各置廟一所并置崇玄館天寶元年親祠玄元廟又於古今人表升玄元皇帝爲上聖其時同制莊子號南

華真人文子號通玄真人。列子號冲虛真人。庚子號洞重真人。又以其所著之書並爲經。其年

九月改兩京。玄宗廟爲太上玄元皇帝宮。二載西京

改爲太清宮。東京改爲太微宮。天下諸郡爲紫極宮。

祝版改爲清詞於紙上。十三載正月。令有司每至孟

月。則修薦獻。上香之禮。仍爲常式。七載五月。詔修漢

梁貞白陶先生冊贈太保貞元元年正月。勅薦享太清宮。亞獻太

常卿充。終獻光祿卿充。仍永爲常式。

孔子祠

漢元帝時。孔霸以帝師。賜爵號。褒成君。奉孔子後。平帝元始初。追謚孔子曰褒成宣尼公。追封孔均爲褒

成侯。後漢光武建武十三年，封均子志爲褒成侯。章

帝元和二年二月，東巡狩，因幸魯祠孔子七十二弟

子。漢晉春秋曰：闕里者，仲尼之故宅也。在魯城中，帝升廟西面，群臣中庭北面，皆再拜。帝進爵而後坐。

東觀書曰：祀禮畢，命儒者論難也。和帝永元四年，徙封爲褒尊侯，相

傳至獻帝初國絕。魏文帝黃初二年，以孔子二十一

代孫議郎羨爲宗聖侯，邑百戶，奉孔子祠，令魯郡修

舊廟，置百戶吏卒守衛。晉武帝泰始三年，改封孔子

二十三代孫宗聖侯，震爲奉聖亭侯。又詔太學及魯

國四時備三牲以祀孔子。明帝太寧三年，詔給奉聖

亭侯四時祀孔子祭，宜如泰始故事。宋文帝元嘉八

年奉聖侯有罪奪爵。至十九年。又授孔隱之。隱之兄子熙先謀逆。又失爵。二十八年。更以孔惠雲爲奉聖侯。後有重疾。失爵。孝武大明二年。以孔邁爲奉聖侯。邁卒。子萃誦俱反。嗣有罪失爵。後魏封孔子二十七葉孫乘爲崇聖大夫。孝文帝太和十九年。改封二十八葉孫珍爲崇聖侯。文成帝詔其宣尼之廟。當別勅有司行薦享之禮。北齊改封三十一葉孫爲恭聖侯。後周武帝平齊。改封鄒國公。隋文帝仍舊封鄒國公。煬帝改爲紹聖侯。唐貞觀十一年。封孔子裔德倫爲褒聖侯。二十一年。制曰。左丘明。卜子夏。公羊高。穀梁赤。

伏勝高堂生戴聖毛萇孔安國劉向鄭眾杜子春馬
 融盧植鄭康成服虔何休王肅王弼杜預范甯賈逵
 總二十二人並為先師。求微中。制令改周公為先聖。
 黜夫子為先師。顏回左丘明從祀。顯慶二年禮部尚
書許敬宗等奏曰
准貞觀二十一年詔以孔子為先聖更添左丘明等
二十二入與顏子俱配宜父於太學並為先師今據
未微令改周公為先聖黜孔子為先師顏回左丘明
並為從祀按禮記凡學春官釋奠于先師鄭康成注
曰官謂詩書禮樂之官也先師者若禮有高堂生樂
有制氏詩有毛公書有伏生可以為之又曰始立學
釋奠于先聖鄭注曰若周公孔子也聖則非周即孔
師則偏善一經漢魏以來取捨各異顏回夫子互作
先師宣父周公更為先聖求其節文遞有得失所以
真觀之制正夫子為先聖加衆儒為先師而今新令
館實取其功仲尼生衰周之末極文喪之弊祖述堯

舜憲章文武宏聖教於六經闢儒風於千載故孟軻稱生民以來一人而已自漢以降奕葉繼侯崇奉其聖迄于今日胡可降教先哲俯入先師且又丘明之徒見行其學厥為從祀亦無故事今請改令從詔於義為允其周公仍依舊禮配享武王也高宗乾封元年正月東巡次兗州鄒縣頓祭宣父廟贈太師總章元年二月皇太子請學贈顏回太子少師曾參太子少保神龍初詔以鄒魯百戶封崇道公宣尼采邑用供薦享又授裔孫褒聖侯崇階朝散大夫仍許子孫以相傳襲開元八年勅改顏子等十哲為坐像悉應從祀曾參大孝德冠同列特為素像坐於十哲之次圖畫七十子及二十二賢於廟壁上以顏子亞聖親為之贊以書于后

閔損以下令當朝文士分爲之贊

時國子司業李元
雖矣稱先聖孔宣

父廟先師顏子配坐今其像立侍配享合坐十哲第
子雖復列像廟堂不應享祀謹檢祠令何休范甯等

二十二賢猶露從祀其十哲請春秋釋奠列享在二
十二賢之上七十子請圖形於壁兼爲立贊又曾參

孝道可崇獨受經於夫
子請准二十二賢應饗二十七年八月制夫子追贈

謚爲文宣王宜令三公持節冊命並撰儀注昔緣周

公南面夫子西坐今位旣有別坐豈仍舊宜補其墜

典未作常式自今以後夫子南面而坐內出王者袞

冕之服以衣之十哲等東西列侍顏淵旣云亞聖須

優其秩

顏子淵贈充國公

閔子騫贈費侯

冉伯牛贈鄆侯。

冉仲弓贈薛侯。

宰子我贈齊侯。

端木子貢贈黎侯。

冉子有贈徐侯。

仲子路贈衛侯。

言子游贈吳侯。

卜子夏贈魏侯。

又夫子格言參也稱魯雖居七十之數不載四科之目頃雖參於十哲終未殊於等倫又稽先旨俾修舊位庶乎禮得其序人焉式瞻命尚書右丞相裴耀卿攝大尉持節就國子廟冊冊畢所司奠祭亦如釋奠之禮又遣太子少保崔琳往東都就廟行冊禮又勅兩京及兖州舊宅廟像宜改服衮冕其諸郡及縣廟

字旣小，但移南面，不須改衣服。兩京樂用宮懸。春秋
三仲上丁，令三公攝行事。七十子並宜追贈。

曾參贈郈伯。

顓孫師贈陳伯。

澹臺滅明贈江伯。

宓子賤贈單伯。

原憲贈原伯。

公冶長贈莒伯。

南宮子容贈郟伯。

公皙哀贈郕伯。

曾點贈宿伯。

顏路贈杞伯。

商瞿贈蒙伯。

高柴贈共伯。

漆雕開贈滕伯。

公伯寮贈任伯。

司馬牛贈向伯。

樊遲贈樊伯。

有若贈卞伯。

公西赤贈郈伯。

巫馬期贈郈伯。

梁鱣贈梁伯。

顏柳贈蕭伯。

冉孺贈紀伯。

曹邴贈曹伯。

伯虔贈聊伯。

公孫龍贈黃伯。

冉季贈東平伯。

秦子南贈少梁伯。

漆雕子歛贈武城伯。

顏子驕贈瑯邪伯。

漆雕徒父贈須句伯。

壤駟赤贈北徵伯。

商澤贈睢陽伯。

石作蜀贈石邑伯。

任不齊贈任城伯。

公夏首贈亢父伯。

公良孺贈東平伯。

后處贈營丘伯。

秦子開贈彭衙伯。

奚容箴贈下邳伯。

公有定贈新田伯。

顏襄贈臨沂伯。

鄒單贈銅鞮伯。

句井疆贈淇陽伯。

罕父黑贈乘丘伯。

秦商贈上洛伯。

申黨贈邵陵伯。

公祖子之贈期思伯。

榮子棋贈零婁伯。

縣成贈鉅野伯。

左人郢贈臨淄伯。

燕伋贈漁陽伯。

鄭子徒贈滎陽伯。

顏之僕贈東武伯。

原亢籍贈萊蕪伯。

樂欬贈昌平伯。

廉絜贈莒父伯。

顏何贈開陽伯。

叔仲會贈瑕丘伯。

狄黑贈臨濟伯。

邽異贈平陸伯。

公西輿如贈重丘伯。

公西箴贈祝阿伯。

孔忠贈汶陽伯。

蘧瑗贈衛伯。

施恒贈乘氏伯。

林放贈清河伯。

秦非贈汧陽伯。

陳亢贈潁伯。

申棖贈魯伯。

琴牢贈南陵伯。

顏噲贈朱虛伯。

琴張贈南陵伯。今考琴牢即琴張疑重出。

步叔乘贈淳于伯。

太公廟

唐開元十九年四月。兩京及天下諸州各置太公廟一所。以張良配享。春秋取仲月上戊日祭。每出師命將。就廟引辭。仍簡取自古名將功成業著宏濟生人者十人。准十哲例霑享。至乾元元年九月十二日。太常少卿于休烈奏。臣昨因秋享漢高祖廟。見旁無侍臣享。太公廟有張良在側。良實漢佐命。請移配享於漢祖廟。從之。上元元年。追封太公望爲武成王。依文宣王置廟。仍擇古今名將。准文宣王置亞聖及十哲等享祭之典。一同文宣王。

巡狩

唐虞五載一巡狩。歲二月東巡狩。至于岱宗。柴望秩于山川。群后四朝。肆覲東后。協時月正日。同律度量。衡修五禮。五玉三帛。二生一死。贄五月南巡狩。至于南嶽。八月西巡狩。至于西嶽。十有一月北巡狩。至于北嶽。皆如岱宗之禮。歸格于藝祖。用特。夏后氏因之。周制十二年一巡狩。天子將巡狩。類于上帝。宜乎社。造乎禰。乘金輅。建大旂。歲二月東巡狩。至于岱宗。柴望祀于山川。而覲諸侯。其方之諸侯。先於境首待之。所過山川。則使祀宗。先以三等璋瓚。皆以黃金爲勺。酌鬱鬯以禮神。次乃校人殺黃駒以祭之。既至方岳。

先問百年就見之。若八十九十者。路經其門。則見之。不然則不。天子乃令太師採民之歌謠。以樂播而陳之。以觀風俗。以審善惡。令典市之官。陳百物之貴賤。以觀民之好惡。又命典禮之官。考校四時節氣。月之晦朔甲乙等日。及候氣之律呂。所用禮樂宮室車旗等制度。君臣上下之衣服。皆以王者所頒制度考校之。諸侯封內有名山大川。不舉而祭之者。爲不敬。削其地。有祭宗廟不順。昭穆者。爲不孝。絀其爵。變禮易樂者。爲不從。其君流。革制度衣服者。爲畔。其君討。有功德於民者。加地進律。其諸侯待王之牢禮。以一犢。

既黜陟諸侯。乃與之相見。方岳之下。築壇與覲禮壇制同。其壇外爲土埽。方三百步。謂之宮。開四門。壇方九丈六尺。高四尺。上爲堂。下爲三等。謂之三成。成每等高一尺。其堂上置司盟之神位。謂之方明。諸侯之上介。各以其君之旂置於宮內。以表立位之處。詔王升壇。訖。諸侯皆就其旂而立。其位。鄭氏按。明堂位云。諸公中階之前。北面東上。諸侯阼階之東。西面北上。諸伯西階之西。東面北上。諸子門東。北面西上。諸男門西。北面東上。王乃於壇上揖之。以定其位。諸侯乃進升壇。莫王公於上等。莫桓圭。侯伯於中等。莫信圭。

躬圭子男於下等。莫穀璧蒲璧。諸侯各奠玉。訖降拜。

又升成拜訖。擯者乃延諸侯升堂。授王玉。訖乃以璧

琮行享禮。謂之將幣。王人云。璧琮九寸。諸侯以享天子。是也。諸侯既朝

見王訖。乃退而自相與盟。王宮之伯臨之。其五月南

巡。狩至于南嶽。如東巡。狩之禮。八月西巡。狩至于西

嶽。如南巡。狩之禮。十有一月北巡。狩至于北嶽。如西

巡。狩之禮。巡。狩訖却歸。每廟用一牛以告。至謂之歸

格于祖禰。用特。秦始皇三年東巡。狩郡縣。祠鄒嶧山

頌功業。其年復遊海上。三年遊碣石。從上郡歸。五年

神仙奇藥之術。無復觀民風。二世元年東巡碣石。並

海南歷泰山至會稽皆禮祠之而勒始皇所立石書

旁以彰始皇之功德漢武帝元狩四年始巡郡縣寤

尋於泰山元封初復至海上又北至碣石又自遼西

歷北邊至九原五月乃至甘泉周萬八千里武帝亦如秦始

皇之事後漢光武建武三十年三月幸魯漢祀令曰天子行有所之

至河沈白馬埵壁各一衣以繒緹五尺柯用脯二東

酒六升鹽一升涉渭灑涇洛他名水如此者沉圭壁

各一律在所給祠具及行沉祠他川水先過泰山祭

泰山及梁父章帝元和二年二月東巡狩使使者奉

一太牢祠帝堯於濟陰成陽靈臺至泰山辛未柴祭

天地群臣如故事壬申宗祀五帝於孝武所作汶上

明堂光武配卒事遂覲東后饗賜王侯群臣因行郡國幸魯祠東海恭王孔子七十二弟子四月還京師庚申告至祠高祖光武廟各一特牛安帝延光三年東巡狩至泰山柴祭及祠汶上明堂如元和中故事魏明帝凡三東巡狩所過存問高年恤疾苦或賜穀帛有古巡幸之風焉齊王正始中巡洛陽縣賜高年力田各有等差晉初新禮巡狩方岳柴望告至設壇宮如禮諸侯之覲者擯及執贄皆如朝儀而不建旂

摯虞以覲禮諸侯各建其旂章所以殊爵命示等威詩稱君子至止言觀其旂宜定新禮建旂如舊禮詔可其議然終晉代其禮不行武帝泰始四年詔使使持節侍中黃門侍郎即銜命四出周行天下其萬民之

利害爲一書。禮俗政事教理刑禁逆順爲一書。悖逆暴亂作慝犯令爲一書。孔喪荒凶厄貧爲一書。康樂和親安平爲一書。每國辨異之。以反命于王。宋文帝元嘉四年二月。東巡狩。至于丹徒。告覲園陵。三月。饗會父老舊勲于行宮。加賜衣裳幣帛。蠲租原刑。戰亡之家及單孤。隨宜隱卹。二十六年二月。東巡幸。至京城。并謁二陵。會舊京故老萬餘人。饗勞賚發。赦蠲徭役。後魏文成帝和平元年正月。東巡狩。歷橋山。祀黃帝。遼西。遙祀醫無閭山。遂緣海幸冀州。北至中山。過恒嶽。禮其神而返。明年南巡。過石門。遣使者用玉璧牲牢禮恒嶽。隋煬帝自文帝山陵纔畢。卽事巡遊。乃慕始皇漢武之事。西

征東幸無時暫息六宮與文武吏士常十餘萬人然
非省方展義之行也唐皇帝將巡狩所司承制先頒
告于東方諸州曰皇帝二月東巡狩各修平乃守考
乃職事駕將發告圓丘宗廟社稷皆如開元禮高宗
元年九月幸并州令度支郎中狄仁傑為知頓使并
州長吏李知玄以道出妬女祠俗云盛衣服過者必
致風雨之變遂發數萬人別開御道仁傑曰天子之
行千乘萬騎風伯清塵雨師灑道何妬女之害遠令
罷之上聞之歎曰真大丈夫也

封禪

古者帝王之興每易姓而起以致太平必封乎泰山
所以告成功也禮云因名山升中于天封禪必於泰
山者萬物交

代之處封增其高順其類也升封詢而禪梁父亦以

上也中成也刻石紀號著功績

告太平也封禪者高厚之道也封土於山而禪祭于

以報天厚梁父之階以報地梁父者泰山之支山卑

下者也能以其道配成高德故禪梁父亦以告太平

也無懷氏封泰山禪云管仲對齊桓公曰古者封

而夷吾所記者十有二焉韓詩外傳曰孔子升泰山

觀易姓而王可得而數者七十餘氏不可得而數者

萬數表准正論曰唯周官有王大封之文按成王封

禪而文武皆不在七十二君而無一言見于經傳學

者疑焉晉灼曰云云山在蒙伏義神農並因之黃帝

陰縣故城北東下有云亭

禪亭亭晉灼曰漢地理志

嶺帝帝學堯舜復禪云云

禹禪會稽湯依禪云其所封皆於泰山也周成王

封泰山禪社首社首山晉灼曰其儀不存襄王時齊

在鉅平十二里桓公既霸

會諸侯於蔡立而欲封禪謂管仲曰寡人兵車之會
三而乘車之會六九合諸侯一臣天下諸侯莫遠我
昔三代受命亦何以異於是管仲觀桓公不可窮以
辭因設之以事曰古之封禪必鄙上之黍比里之禾
所以爲盛江淮之間一茅三脊所以爲藉也東海致
比目之魚西海致比翼之鳥然後物有不召而自至
者十有五焉今鳳凰麒麟不至嘉禾不生
而欲封禪無乃不可乎於是桓公乃止秦始皇平
天下三年東巡郡縣祠騶嶧山紀秦功業於是召齊
魯儒生七十人至于泰山下諸儒或議曰古者封禪
爲蒲車惡傷山之土石草木埽地祭席用菹藉音憂禾藁
也去其皮言其易遵也始皇聞此議各乖異難施用
以此爲席言其易遵也始皇聞此議各乖異難施用
由此黜儒生而遂除車道上自泰山陽至巔立石頌
德文曰事天以禮立身以義事父以孝成人以仁四

守之內莫不郡縣四屬八蠻咸來貢職民庶蕃息天

祿求得刻石改號

文出晉太康郡國志

有金冊石函金泥玉檢

之事焉從陰道下禪梁父其禮頗采秦祝之祀雍上

帝所用封藏而皆秘之固不得而記之

封禪之後十歲秦亡諸

生疾秦焚詩書戮文學皆傷曰始

漢武帝立二十八

年元鼎中汾得寶鼎遂議封禪而群儒不能知其儀

又牽拘於詩書古文於是帝盡罷諸儒用方士言以

三月東上泰山立石泰山之巔石高三丈一尺方博

皆三尺壇及壇皆廣長十二丈增高三尺帝因東至

海上四月還至奉高

晉太康郡國志曰奉高戶千五百六戶此爲奉高者以祀東嶽

帝王禪代之處是以殊之也。故有明堂。在縣西南四里。又有奉高宮。又至梁父禮祠地。主乙卯。令侍中儒者皮弁薦紳射牛行事。封泰山下東方。如郊祀太一之禮。封廣丈二尺。高九尺。其下則有玉牒書書秘。禮畢。天子獨與侍中奉車子侯霍去也。上泰山。亦有封。其事皆禁。明日。下陰道。丙辰。禪泰山下。趾東北肅然山。晉太康郡國志曰。漢武封泰山。禪梁父。參諸家所說。宜肅然爲也。如祭后土禮。天子皆親拜見。衣尚黃。而盡用樂焉。江淮間一茅三脊爲神藉。五色土益雜封。縱遠方奇獸蜚禽。及白雉諸物。頗以加禮。兕牛犀象之屬不用。皆至泰山然後去。封禪祠其夜若有光。晝有白雲起。

封中天子從禪還坐明堂群臣更上壽改元爲元封

時作明堂汶上太史公曰其封禪之禮則有司存而漢史不得其制後漢光武建武三

十年群臣上言宜封禪泰山詔書曰即位三十年百

姓怨氣滿腹吾誰欺欺天乎三月帝幸魯祭泰山及

梁父三十二年詔梁松按索河維讖文言九世封禪

事者松等列奏乃許焉東觀書曰群臣奏言登封告成爲民報德百王所同陛下

輒拒絕不許臣下不敢頌功述德業求元封時故事議封禪所施用有

司奏當用方石再累置壇中皆方五尺厚一尺用玉

牒書藏方石牒厚五寸長尺三寸廣五寸有玉檢又

用石檢十枚列於石傍東西各三南北各二皆長三

尺廣一尺厚七寸。檢中刻三處深四寸方五寸有蓋。檢用金縷五周以水銀和金以爲泥。玉璽二其一方一寸二分。其一方三寸方石四角又有距石皆再累枚長一丈厚一尺廣二尺皆在圓壇上其下用距石十八枚皆高三尺厚一尺廣二尺如小碑環壇立之。去壇三步距石下皆有石跗入地四尺又用石碑高九尺廣三尺五寸厚尺二寸立壇之丙地去壇三丈以上以刻書帝以用石功難又欲及二月封禪故詔梁松欲因故封石空檢更加封而已。欲及二月者書歲二月東巡狩至岱宗柴祭山曰燔柴積柴柴加性於其上而燔之也松上疏爭之以爲登封

之禮。告功皇天。垂後無窮。以爲萬民也。承天之敬。猶宜章明。奉圖書之瑞。尤宜顯著。今因舊封。竄寄玉牒。故石下。恐非重命之義。受命中興。宜當特異。以明天意。遂使泰山郡及魯趣音促石工。宜取完青石。無必五色。令印工刻玉牒。書書秘。刻方石中。命容玉牒。二月。帝至奉高。遣侍御史與蘭臺令史將工先上山刻石。二十二日辛卯晨。燎祭天於泰山下南方。群神皆從祀。用樂如南郊。諸王王者後二公。孔子後。褒成君皆助祭位事也。事畢將升封。或曰。泰山雖已從食於柴祭。今親升告功。宜有禮祭。於是使謁者以一牲牲於

常祠泰山處告祠泰山如親耕疆劉先祠先農先虞
 故事至食時帝御輦升山日中後到山上更衣早晡
 時即位于壇北面群臣以次陳後西上畢位升壇尚
 書令奉玉牒檢皇帝以寸二分璽親封之訖太常命
 人發壇上石尚書令藏玉牒已復石覆訖尚書令以
 五寸印封石檢封禪儀曰以金為繩以石為檢東方
西方各三檢檢中石泥及壇土各如
其方色也事畢皇帝再拜群臣稱萬歲命人立所刻石碑
 乃復道下二十五日甲午禪祭地于梁甫陰以高后
 配山川群神從祀如元始中北郊故事項威曰除地
曰禪神四月己卯大赦天下以建武三十二年為建
之也

武中元元年。復博奉高廟。勿出元年。租芻粟。以吉日。刻玉牒書。函藏金匱。璽印封之。乙酉。使太尉行事。以特牲告至高廟。太尉奉匱以告高廟。藏于廟室西壁石室高主室之下。崔靈恩曰。自周以前。封者皆封土。爲壇。至秦始皇漢武帝始用石檢。魏明帝時。中護軍蔣濟請封禪。帝雖拒濟議。而實使高堂隆草封禪儀。以天下未一。不欲便行大禮。會高堂隆卒。不行。晉武帝平吳。太康元年九月。衛瓘議封禪。帝曰。此盛德事。所未議也。瓘等又奏。至于再三。詔報絕之。宋文帝在位長久。有意封禪。詔學士山謙之草其儀注。屬後魏師南逼。其意乃息。孝武大明元年。

十一月戊申。太宰江夏王義恭表三請。帝以文軌未
一不從。北齊有巡狩之禮。并登封之儀。終不行。隋開
皇十四年。群臣請封禪。文帝命牛弘等創定其禮。帝
曰。此事體大。朕何德以堪之。但當東巡。因邦岱山耳。
十五年春。行幸兗州。遂次岱嶽。爲壇如南郊。又壇外
爲柴壇。飾神廟。展宮懸之樂於庭。爲埋埴二於南門
外。又陳樂設位於青帝壇如南郊。帝服袞冕。乘金輅。
備法駕而行。禮畢。遂詣青帝壇而祭焉。唐貞觀十一
年。左僕射房玄齡等議封禪儀注。至高宗麟德三年
正月戊辰朔。有事于泰山。皇帝親祀昊天上帝於封

祀之壇。己巳。登于泰山。行封禪之禮。庚午。降禪于杜首山。壬申。大赦天下。改元爲乾封。武后天冊萬歲二年。臘月甲申。登封于嵩山。大赦天下。改元爲萬歲登封。丁亥。禪于少室山。明皇開元十三年十月。封祀于泰山。去山趾五里西。去杜首山十里。丁亥。服袞冕於行宮。致齋於供帳前殿。己丑。大備法駕。至山下。乃御馬而登。侍臣從。帝以靈山清潔。不欲多人上。乃召禮官學士。賀知章等。入講儀注。以三獻。悉於山上。而在一處行其事。五方帝及諸神座。於山下壇行事。儀注之詳。具開元禮。

歷代所尚

高陽氏尚赤。

以十一月為正。

薦玉以赤繒。高辛氏尚黑。

以十月為正。

正。

薦玉以黑繒。陶唐氏尚白。

以十二月為正。

薦玉以白繒。有

虞氏尚赤。

以十一月為正。出尚書中候。

夏后氏尚黑。

以建寅月為正。

大事

飲用昏。戎事乘驪。

馬黑色。曰驪。

一牲用玄。以黑為徽號。

徽謂旌旂。

也。朝燕服收冠而黑衣。宮室之制。屋十寸為尺。商人

尚白。

以建丑月為正。

大事飲用日中。戎事乘翰。

白馬。

牲用白。以

白為徽號。朝燕服皞冠而縞衣。宮室之制。屋十二寸

為尺。周人用赤。

以建子月為正。

大事飲用日出。戎事乘駟。

黃元。

馬腹赤。

牲用騂。以赤為徽號。朝燕服冕冠而玄衣。宮室

之制屋八寸爲尺。秦水德。漢書律歷志。秦自以水德。故十月爲歲首。漢火德。初亦以十月爲歲首。及文帝立。公孫臣言。漢當土德。其應黃龍見。丞相張蒼以爲漢乃水德。河決金堤。是其符也。年始冬十月。以外黑內赤。十月陰氣在外。故黑。陽氣尚伏在內。故赤。明年黃龍果見於成紀。帝於是令博士諸生申明土德。草改歷服色事。至武帝元封七年。用倪寬等議。改用夏正。以建寅月爲歲首。劉向以爲赤帝斬蛇之符。爲火德。後漢並同前漢。魏土德。文帝以建寅月爲正。服尚黃。臘以丑。牲以白。節毛當赤。節幡當黃。郊祀朝會四時之服。如漢制。宗廟

所服如周禮。明帝青龍五年三月，用博士秦靜等議，改爲景初元年，以建丑月爲正。三年正月，帝崩，齊王立，以明帝建丑月崩，若以其月正朝會設樂，不合於禮。於是改以建寅之月爲歲首。袁准正論曰：自非繼亂，不宜改正也。晉金德武帝泰始二年，散騎常侍傅玄上議：帝王受命，應歷禪代，則不改正朔。遭變征伐，則改之。舜正月上日受終于文祖，無改正之文。唐虞正朔皆同明矣。至商周革命，乃改。魏受漢禪，亦已不改。至於服色，皆從其本。唯節幡用黃。大晉以金德王天下，順五行三統之序矣。詔從之。由是正朔服色，並依前代。東晉並同。

西晉宋水德亦如魏晉故事齊木德餘一依前代梁
火德餘一依前代陳木德餘一依前代後魏初爲土
德言繼黃帝之後也故數用五服尚黃犧牲用白至
孝文太和十四年用秘書丞李彪等議承晉後改爲
水德祖辰臘申北齊木德正朔服色皆如後魏後周
承西魏用水德以文帝誕有玄氣之祥又有黑水讖
故也建寅月爲正服色尚黑隋火德以赤雀降祥之
故衣服旗幟犧牲尚赤戎服以黃七月帝始服黃唐
土德建寅月爲歲首武太后未昌元年十一月一日
依周制以建子之月爲正改元
爲載初元年改十一月爲正月十二月爲臘月來年
正月爲一月十月建亥爲年終載初元年九月九日

改元天授稱周改皇帝為皇
嗣二年正月旗幟尚赤也
天寶九年制應緣隊仗
所用緋色幡等並改為赤黃色天下皆然納崔昌議
以土德承漢火德

享司寒 藏冰開冰附

周制凌人掌冰正歲十有二月令斬冰三其凌正歲
火星中大寒水方盛之時也凌冰春始治鑑鑑如甄
室也三其凌三倍其冰備消釋也二月將獻羔而開冰鑑胡暫反醜音直偽反祭祀供
冰鑑賓客供冰大喪供夷槃冰口之槃夏頒冰掌事
暑氣盛王以水秋刷月令仲春天子乃獻羔開冰先
班賜則主為之薦寢廟謂立春藏水至春分方溫故獻羔以祭左傳

魯大夫申豐曰古者日在北陸而藏冰

陸道也夏十月道也夏十

危水堅而藏之

西陸朝覲而出之

夏三月日在昴畢蟄虫出而用冰春分之中奎婁在

東方其藏冰也深山窮谷固陰沍寒用黑牡秬黍以享

司寒於是取而藏之也周其出之也桃弧棘矢以除

其災於是以風出而用之

順春風而敬用之

朝之祿位賔客

喪祭自命夫命婦至于老疾冰皆與焉宋孝武帝大

明六年立凌室藏冰有司奏季冬之月冰壯之時凌

室長率山虞及輿隸取冰於深山窮谷固陰沍寒之

處以納于凌陰務令周密無洩其氣先以黑牡秬黍

祭司寒於凌室之北仲春之月春分之日以黑羔秬

黍祭司寒。啓冰室。先薦寢廟。凌室在樂遊苑內。置長一人。吏一人。保舉吏二人。隋以季冬藏冰。仲春開冰。並因用黑牡。秬黍於冰室。祭司寒神。開冰依以桃弧棘矢。唐制。先立春三日。因用黑牡。秬黍。祭司寒之神於冰室。祭訖。鑿冰千段。方三尺。厚尺五寸。而藏之。仲春開冰。祭如藏禮。依以桃弧棘矢。設於冰室戶內之右。禮畢。遂留之餘。具開元禮。

禋

周制春官大祝掌六旂。其四曰禋。祭法云。幽禋祭星也。雩禋祭水旱也。漢制謂禋爲請晴。服赤幘。朱衣。晉

武帝咸寧及太康中時雨多則禱祭赤幘朱衣閉諸
 陰朱絲縈社伐朱鼓焉梁制霖雨祈晴亦如雩禮隋
 制霖雨則禱京城諸門三禱不止則祈山川岳鎮海
 瀆社稷又不止則祈宗廟神州報以太牢州郡縣苦
 雨亦各禱其城門不止則祈界山川社稷報用羊豕
 唐因之禱門不止乃祈山川岳鎮海瀆三日不
 祈社稷宗廟並用酒脯國城門用少牢

葦菱桃梗讓祠

夏后氏金行初作葦菱言氣所交也呂氏春秋曰始
 得伊尹被之於
廟薰以荏葦菱者交
 易陰陽代興之義也
 商人水德以螺首慎其閉塞使
 如螺也周人木德以桃為梗漢制厲殃祀天地日月

星辰四時陰陽之神。以師曠配之。其壇常祀以禳災兼用三代之儀。以葦菱桃梗。五月五日。朱索五色印。爲門戶飾。以儼止惡氣。後漢仲夏之月。萬物方盛。日夏至。陰氣萌作。恐物不懋。其禮以朱索連葦菜彌牟。朴蠱鍾。以桃印長六寸方三寸。五色書文。如法以施門戶。魏明帝大修禳禮。故何晏禳祭儀。雜特性供禳釁之事。磔雞起於魏。未詳改仲夏在歲旦之所起耳。晉依魏制。每歲朝設葦菱桃梗。磔雞於宮。及百寺之門。以辟惡氣。泰始二年。有司奏春分祀厲殃及禳祠。詔曰。不在祀典。除之。宋皆省其禮。而郡縣往往猶存。

高禘

周制。月令仲春。玄鳥至之日。以太牢祠于高禘。

高辛氏之

世玄鳥遺卵。城簡吞之。生契。後王以爲媒官。嘉祥而立其祠。

天子親往。后妃帥九

嬪御。乃禮。天子所御。帶弓韉。授以弓矢于高禘之前。

天子所御。謂今有娠者。禮謂酌飲於高禘之庭。帶以弓韉。求男之禮。

漢武帝年二十九

乃得太子。甚喜。始立爲高禘之祠於城南。祭以特牲。

晉博士束皙云。漢武帝晚得太子。始爲立高禘之祠。立石爲主。祀以太牢也。

後漢因之。祀

于仲春之月。晉以仲春之月高禘。祀于城南。祀以特

牲。惠帝元康六年。高禘壇上石中破。博士議禮無高

禘置石之文。未知設造所由。既已毀破。可無改造。東

督議以爲石在壇上。蓋主道也。禮制器弊則埋而置新。今宜埋而更造。不宜遂廢。後得高堂隆故事。詔更鑿石。令如舊置高禋壇上。埋破石入地一丈。按江東門內道西有石。文如竹葉。小屋覆之。宋文帝元嘉中修廟所得石。陸澄以爲晉孝武時郊禋石。然則江左亦有此禮矣。或曰百姓祀其傍。或謂之落星也。北齊制高禋壇於南郊。廣輪二十六尺。高九尺。四陛三壝。每歲玄鳥至之日。皇帝親帥六宮。祀青帝於壇。以太昊配。而祀高禋之神。以祈子。其儀青帝北方南向。配帝東方西向。禋神壇下東陞之南西向。禮用青珪。東帛。牲共以一太牢。祀日。皇帝衮冕乘玉輅。皇后褱衣乘重翟。皇帝初獻。降

自東陞皇后亞獻降自西陞並詣便座夫人終獻上
嬪獻于禱神訖帝及后並詣攢位乃送神皇帝皇后
及群臣皆拜乃撤就燎禮畢而還隋亦以玄鳥至日
祀高禘於南郊壇牲用一太牢唐月令亦以仲春玄
鳥至之日以太牢祀于高禘天子親往月令經文及
注不言有壇
也。廟

禘禘

周制春官女巫掌歲時禘除釁浴漢高后八月禘於
灞上後漢三月上巳官民皆絜於東流水上曰洗濯
禘除去宿垢疾爲大絜魏氏以來但用三月三日不

用上巳也。晉公卿以下至于庶人皆禊洛水之側。趙王倫篡位三日會天泉池。誅張林。懷帝亦會天泉池。賦詩。陸機云。天泉池南石溝引御溝水。池西積石爲楔堂。跨水流杯飲酒。不言曲水。韓詩曰。鄭國之俗。三月上巳之日。溱洧水上。招魂續魄。秉蘭草。祓除不祥。蔡邕曰。今三月上巳。祓於水濱。蓋出此也。一說三月三日。清明之節。將修事於水側以祈豐年也。一說郭虞三月上辰日上巳日。二日產三女。並不育。俗以爲大忌。至此月巳日。諱止家。皆於東流水上爲祈禳。自潔濯。謂之楔祠。引流行觴。遂成曲水。梁劉昭曰。郭虞之說。良爲虛誕。假有

庶人旬內夭其三女何足警彼風俗乎杜篤賦乃稱
王侯公主暨于富商用事伊洛帷幔玄黃本傳大將
軍梁商亦歌泣於洛襍也劉禎魯都賦曰素秋二七
天漢指隅人胥袞襪國子水嬉此用七月十四日也
東晉元帝詔罷三日弄具海西公於鍾山立流杯曲
水延百僚皆其事也齊以三月三日曲水會古禊祭
也今相承爲百戲之具雕弄巧飾增損無常

諸雜祠

周立壽星祠於下杜亳

徐廣云京兆杜縣有亳亭也

時奉焉又立

杜主祠因宣王殺右將軍杜伯不以罪後宣王田於

圃田見杜伯執弓矢射王王伏弓而死故周人尊其

鬼而以歲時奉祠秦立陳寶祠因文公獲若石于陳

倉北阪城祠之蘇林曰質如石如肝其神或歲不至或歲數來

其來常以夜光輝若流星色赤黃長五丈從東方來

集于祠城若雄野雞其聲殷殷云野雞夜鳴以應之

祠以一牢名曰陳寶臣瓚曰陳倉縣有寶夫人祠或一歲二歲與葉君合葉君神來

時天為之雷鳴二世時若陳寶節來一祠春夏用騂秋冬用

騂德公立卜居雍雍之諸祠自此興用三百牢於鄜

時作伏祠孟康曰六月伏日也周時無至此乃有之師古曰立秋之後以金代火金畏於火故

至金日必伏庚金也磔狗邑四門以禦蠱災始皇東游海上祠

八神求仙人其祀莫知起時

八神一曰天主祠天齊淵水居臨菑南郊

山下者二曰地主祠太山梁父蓋天好陰祠之必於

高山之下小山之上命曰時地貴陽祭之必於澤中

圓丘三曰立主祠蚩尤蚩尤在東平陸監鄉齊之西

境也四曰陰主祠三山三山即蓬萊方丈瀛州三神

山五曰陽主祠之眾山在東萊六曰月主祠萊山山

在東萊長廣皆在齊北並勃海七曰日主祠成山山

在東萊不夜縣斗入海最居齊東北隅以迎日出入

日四時主祠琅邪琅邪在齊東北蓋歲之所始也皆

用一牢具祀而巫祝漢高帝天下已定令祝立蚩尤

所損益珪幣雜異焉

之祠於長安又置祠祀官女巫巫其梁巫祀天地天社

天水房中堂上之屬晉巫祠五帝東君雲中君巫社

巫祠族人炊之屬師古曰東君日也雲中君謂雲秦

巫祠社主巫保族纍之屬社主即周之杜伯也巫保秦

族纍二神名纍音力迨反

荆巫祠堂下巫先司命施糜之屬堂下在堂之下巫先巫之最先者也

司命說者云文昌第四星也施糜其先常施設糜鬻者也九天巫祀九天師古曰九天者

謂中央四維也皆以歲時祠宮中武帝即位厚禮置祠神

君於內中聞其言不見其人神君者長陵女子產乳而死見神於先後宛若

宛若祠於其室人多往祠平原君往祠其後子孫尊崇案平原君武帝外祖母也先後妯娌也宛若字也

又帝師少君求仙始親祠竈少翁言於帝曰祠竈皆可致物物鬼也致物而

丹沙可化為金又立粵祠雞卜持雞而卜也是時既滅

兩粵粵人勇之乃言粵人俗鬼師古曰勇之言其土俗尚鬼神之事而其

祠皆見鬼數有効昔東甌王敬鬼壽百六十歲後世怠慢故哀耗乃命粵巫立粵祠祝文安臺無壇亦祠

天神帝宣帝時南郡獲白虎獻其皮牙爪帝為立祠百鬼

又方士言隋侯劔寶玉寶璧周康寶鼎立四祠於未央宮。又祠天封苑火井於鴻門。

西河鴻門有天封苑火井祠。火從地中出。

也。又立歲星辰星太白熒惑南斗祠於長安城傍。又

祠三山八神於曲成。

東萊縣也。

蓬山石杜石鼓於臨胸。又

有月祠蚩尤勞谷五牀山五帝仙人玉女金馬碧雞

等神。遣諫議大夫王褒使持節而求焉。後魏道武帝

初有兩彗星見。劉后使日者占曰。祈之則掃定天下。

后從之。故立其祠。又立歲神十二。歲一祭。以十月用

牛一雞三。又立土神四。歲二祭。常八月十月。用羊。又

立獻明以上天神四十所。歲祭其神。尊以馬。次以牛。

小以羊。皆女巫行事。

禮略第二